



Broj: 20-02-36346-2/23  
Sarajevo, 29.09.2023. godine

Na osnovu člana 19. st. (1) i (2) i člana 23. Zakona o prevenciji i suzbijanju korupcije u Kantonu Sarajevo („Službene novine Kantona Sarajevo“, br. 35/22, 44/22-Ispravka i 52/22-Ispravka) Ured za borbu protiv korupcije i upravljanje kvalitetom Kantona Sarajevo donosi:

## **ODLUKU**

(1) Nakon provedenog postupka utvrđivanja postojanja sukoba interesa za Mamić Kenana, Ured za borbu protiv korupcije i upravljanje kvalitetom Kantona Sarajevo utvrdio je postojanje sukoba interesa za imenovanog, jer isti obavlja više javnih funkcija, i to javnu funkciju člana Drugostepene žalbene komisije za 2023. godinu u Gradskom vijeću Grada Sarajevo, javnu funkciju predsjedavajućeg Komisije za drugostepeno upravno rješavanje u Gradskom vijeću Grada Sarajevo i javnu funkciju punomoćnika koji u ime i za račun Vlade Kantona Sarajevo vrši ovlaštenja predsjednika Skupštine KJKP „Pokop“ d.o.o. Sarajevo, što predstavlja povredu člana 5. stav (1) Zakona o prevenciji i suzbijanju korupcije u Kantonu Sarajevo.

(2) Poziva se Mamić Kenan da podnese ostavku ili da na drugi način odstupi sa dvije nespojive javne funkcije navedene u tački (1) ove odluke, i to u roku od 30 dana od dana prijema ove odluke, te da o istom obavijesti Ured za borbu protiv korupcije i upravljanje kvalitetom Kantona Sarajevo.

## **Obrazloženje**

Ured za borbu protiv korupcije i upravljanje kvalitetom Kantona Sarajevo je nakon izvršenog uvida na internet stranicu Grada Sarajevo i u Registar podataka o imovini nosioca javnih funkcija u Kantonu Sarajevo, 18.08.2023. godine, konstatovao da Mamić Kenan, istovremeno obavlja više javnih funkcija, i to javnu funkciju člana Drugostepene žalbene komisije za 2023. godinu u Gradskom vijeću Grada Sarajevo, javnu funkciju predsjedavajućeg Komisije za drugostepeno upravno rješavanje u Gradskom vijeću Grada Sarajevo i javnu funkciju punomoćnika koji u ime i za račun Vlade Kantona Sarajevo vrši ovlaštenja predsjednika Skupštine KJKP „Pokop“ d.o.o. Sarajevo, što je u suprotnosti sa članom 5. stav (1) Zakona o prevenciji i suzbijanju korupcije u Kantonu Sarajevo, koji propisuje da nosilac javne funkcije može istovremeno obavljati samo jednu javnu funkciju iz člana 2. tačka c) ovog zakona, osim ako posebnim propisom nije drugačije određeno.

Shodno članu 12. stav (1) Zakona o prevenciji i suzbijanju korupcije u Kantonu Sarajevo, Ured za borbu protiv korupcije i upravljanje kvalitetom Kantona Sarajevo je Rješenjem broj: 20-02-36346/23 od 18.08.2023. godine, pokrenuo postupak za utvrđivanje postojanja sukoba interesa za Mamić Kenana. Predmetni postupak je pokrenut po službenoj dužnosti.

Ured za borbu protiv korupcije i upravljanje kvalitetom Kantona Sarajevo je aktom, Obavijest o pokretanju postupka za utvrđivanje postojanja sukoba interesa i zahtjev za pismeno izjašnjenje broj:



20-02-36346-1/23 od 18.08.2023. godine, a shodno članu 16. stav (1) Zakona o prevenciji i suzbijanju korupcije u Kantonu Sarajevo, obavijestio imenovanog o pokrenutom postupku za utvrđivanje postojanja sukoba interesa, te je zatražio pismeno izjašnjenje na navode iz ove obavijesti. U prilogu navedene obavijesti, imenovanom je dostavljeno Rješenje broj: 20-02-36346/23 od 18.08.2023. godine.

Izjašnjenje na navode iz Obavijesti o pokretanju postupka za utvrđivanje postojanja sukoba interesa i zahtjev za pismeno izjašnjenje od strane Mamić Kenana, ovaj ured zaprimio je 13.09.2023. godine.

U Izjašnjenju Mamić Kenan ističe da prvi put od Ureda spoznaje da obavlja javnu funkciju člana Drugostepene žalbene komisije za 2023. godinu u Gradskom vijeću Grada Sarajevo i da mu nije dostavljena bilo kakva odluka o imenovanju na navedenu funkciju. U Izjašnjenju imenovani navodi da je, imajući u vidu Obavijest Ureda, zatražio od Gradskog vijeća Grada Sarajevo potvrdu navedene informacije, te podnio zahtjev za razrješenje sa iste, ukoliko je informacija tačna.

Dalje, imenovani u Izjašnjenju navodi da je odlukom Gradskog vijeća Grada Sarajevo imenovan za člana Komisije za drugostepeno upravno rješavanje i da je od 17.08.2023. godine ovlašten od strane Vlade Kantona Sarajevo za vršenje ovlaštenja Skupštine u KJKP „Pokop“ d.o.o. Sarajevo na period od 90 dana. Članstvo odnosno predsjedavanje Komisijom za drugostepeno upravno rješavanje i biti punomoćnik Vlade Kantona Sarajevo nije u suprotnosti sa odredbama Zakona o prevenciji i suzbijanju korupcije u Kantonu Sarajevo, prema mišljenju imenovanog navedenom u Izjašnjenju.

Postupajući po Zahtjevu Ureda, Gradsko vijeće Grada Sarajevo dostavilo je akt broj: 01-GV-04-1277-1/23 od 14.09.2023. godine, ovom uredu, i u istom se navodi da je **Mamić Kenan vanjski član Drugostepene žalbene komisije za 2023. godinu (Odluka o izboru – Službene novine KS, broj: 10/23) i vanjski član Komisije za drugostepeno upravno rješavanje (Odluka o izboru – Službene novine KS, broj: 19/21).**

Ured za borbu protiv korupcije i upravljanje kvalitetom Kantona Sarajevo obratio se Ministarstvu pravde i uprave Kantona Sarajevo sa zahtjevom za tumačenje odredbi Zakona o prevenciji i suzbijanju korupcije u Kantonu Sarajevo, i to u vezi sa primjenom Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo („Službene novine Kantona Sarajevo“, broj: 31/19), člana 1. stav (2), koji propisuje „da Vlada Kantona će, na prijedlog resornog ministra, ovlastiti punomoćnika/e koji će u ime i za račun Vlade Kantona vršiti ovlaštenja skupštine javnog preduzeća, te utvrditi način izbora punomoćnika“. Od navedenog ministarstva zatraženo je tumačenje (pojašnjenje) odredbi Zakona o prevenciji i suzbijanju korupcije u Kantonu Sarajevo, i to da li se **punomoćnik koji u ime i za račun Vlade Kantona Sarajevo vrši ovlaštenja u skupštini javnog preduzeća smatra nosiocem javne funkcije.**

Ministarstvo pravde i uprave Kantona Sarajevo, shodno članu 10. stav (1) alineja 5) Zakona o organizaciji organa uprave u Federaciji Bosne i Hercegovine („Službene novine Federacije BiH, broj: 35/05), kao nosilac izrade predmetnog zakona, u aktu broj: 03-04-02-34951/23 od 11.08.2023. godine, navodi da je članom 2. tačka c) alineja 4) Zakona propisano da se nosiocima javnih funkcija smatraju *druga lica koja su izabrana ili imenovana ili je za njihov izbor ili imenovanje data saglasnost od strane Skupštine, Gradskog vijeća Grada Sarajevo, općinskog vijeća, Vlade, Gradonačelnika ili načelnika, izuzev državnih službenika.*

U aktu od 11.08.2023. godine, navodi se da članom 2. stav (1) Odluke o vršenju ovlaštenja u privrednim društvima sa učešćem državnog kapitala iz nadležnosti Kantona Sarajevo propisano je da ovlaštenja skupštine u javnim preduzećima u skladu sa zakonom i osnivačkim aktima, vrši Vlada Kantona Sarajevo putem punomoćnika, dok je u stavu (2) člana 2. navedene odluke propisano da će **Vlada Kantona, na prijedlog resornog ministra, ovlastiti punomoćnika/e koji će u ime i za račun Vlade Kantona vršiti ovlaštenja skupštine javnog preduzeća, te utvrditi način izbora punomoćnika.**

Dalje, u aktu se navodi da, **imajući u vidu da su punomoćnici koji vrše ovlaštenja skupštine javnog preduzeća u ime i za račun Vlade Kantona Sarajevo izabrana od strane Vlade, ova lica**

se, shodno članu 2. tačka c) alineja 4) Zakona o prevenciji i suzbijanju korupcije u Kantonu Sarajevo, smatraju nosiocima javnih funkcija.


Imajući u vidu navedene odredbe zakonskih i podzakonskih akata, kao i Mišljenje Ministarstva pravde i uprave Kantona Sarajevo, Ured je utvrdio postojanje sukoba interesa za Mamić Kenana, koji prema podacima dostupnim Uredu za borbu protiv korupcije i upravljanje kvalitetom Kantona Sarajevo obavlja više javnih funkcija, i to javnu funkciju člana Drugostepene žalbene komisije za 2023. godinu u Gradskom vijeću Grada Sarajevo, javnu funkciju predsjedavajućeg Komisije za drugostepeno upravno rješavanje u Gradskom vijeću Grada Sarajevo i javnu funkciju punomoćnika koji u ime i za račun Vlade Kantona Sarajevo vrši ovlaštenja predsjednika Skupštine KJKP „Pokop“ d.o.o. Sarajevo, što je u suprotnosti sa članom 5. stav (1) Zakona o prevenciji i suzbijanju korupcije u Kantonu Sarajevo, koji propisuje da nosilac javne funkcije može istovremeno obavljati samo jednu javnu funkciju iz člana 2. tačka c) ovog zakona, osim ako posebnim propisom nije drugačije određeno.

Nosilac javnih funkcija, Mamić Kenan, dužan je u roku od 30 dana od dana prijema ove odluke, podnijeti ostavke ili na drugi način odstupiti sa dvije od više javnih funkcija koje istovremeno obavlja i o tome pismeno obavijestiti Ured za borbu protiv korupcije i upravljanje kvalitetom Kantona Sarajevo.

Shodno navedenom, Ured za borbu protiv korupcije i upravljanje kvalitetom Kantona Sarajevo je u skladu sa članom 19. st. (1) i (2) Zakona o prevenciji i suzbijanju korupcije u Kantonu Sarajevo odlučio kao u dispozitivu ove odluke.

Ova odluka stupa na snagu danom donošenja i obavezujuća je za nosioca javnih funkcija.

**Pouka o pravnom lijeku:** Ova odluka je konačna i protiv iste nosilac javnih funkcija može pokrenuti upravni spor.



ŠEF UREDA

Erduan Kafedžić

Dostaviti:

1. Imenovanom,
2. Za objavu na internet stranici Ureda za borbu protiv korupcije i upravljanje kvalitetom Kantona Sarajevo,
3. a/a.